

Kyrkjeblad for Fjaler

NR.3 DESEMBER 2024

82. ÅRGANG

God jul!

Fredsfyrsten

Eg hugsar første gongen
eg feira jul langt heimafrå.
Alle dei gode julekjenslene
var borte. Eg lengta tilbake
til julefeiringa slik den skulle
vere. Den gode julematen.
Den fine julepynten. Treet
som lyste i stova. Pakkane
som låg under treet. Heime
med levande lys sat vi til
bords og kjente at vi levde
og at vi høyrde saman.

Så song vi «Eg er så glad
kvar julekveld – for då blei
Jesus fødd.»



Som Jesus, blei også du og
eg fødd ein gong.
Barnet vaknar, og opp gjennom barndomen opplever
eg: Himmelen er blå, sola er varm. Blomstene er vakre.
Kyrkjeklokker, kveldsbøn, julestemning og Jesusbilete.

Så blir eg eit vakse menneske.
Barndomens rike glir bort, og dermed fell også Guds
rike litt i stykke.
Jesus er blitt kristendom, ord og dogme.

Eg gret og eg ler.
Det er det livet handlar aller mest om. Det er dei to
viktigaste kjenslene.
Eg jublar og eg fortvilar.

I blant faldar eg hendene mine mine
Kanskje eg nemner for Gud min klage og mi takk.

Eg tykkjer vi er heldige i Fjaler. Bygda er i grunnen den
beste staden å feire jul. Her kjenner vi kvarandre og
bryr oss om kvarandre. Det er noko fint å eige forventin-
ga til noko kjent. Og på julegudstenesta kjem den same
forteljinga som sist; juleevangeliet.

Så syng vi «Deilig er jorden», medan noko varmt rislar
gjennom kropp og sjel. Salmen gjer oss igjen til ein
syskenflokk som står tett saman, og viser at vi bryr oss.

Vi behøver eigentleg jula. Fordi vi er menneske som frys
iblant. Vi veit kva mørke er, og død.

Leonard Cohen har skrive:
Ring the bells that still can ring
Forget your perfect offering

There is a crack in everything
That's how the light gets in

Jula er som bitar av eit knust spegel, ein gong halden
over Jesus julenatt. I jula ser vi på nytt i nokre av spege-
lbitane og veit at ord som Gud og Himmel og Fred og
Glede også høyrer med i vårt skjøre liv.

På barneskulen pleide vi å lese denne bibelteksten:
Det folket som går i mørkret,
ser eit stort lys.
Over dei som bur
i dødsskuggens land,
strålar lyset fram.
For eit barn er oss fødd,
ein son er oss gjeven.
Herreveldet er lagt på hans skulder.
Han har fått namnet
Underfull rådgjevar, Veldig Gud,
Evig Far, Fredsfyrste. (Jes9,2.6.)

Så er vi ikkje urealistiske drøymarar når vi syng frå
djupe av vår lengt:
«Fred over jorden,
menneske, fryd deg!
Oss er en evig Frelser født!»

Lat jula sine tradisjonar og kulissar ikkje lenger skjule
Han, men omkrans Han: Slepp inn lyset gjennom
sprekkene. Så han kan skine.

God jul!

Knut Arne Kummeneje

Julekonsert i Dale kyrkje med Julesong - måndag 2. desember kl. 18.00

Julekonsert med Einar Bolstad, Kari Malmanger og Gunn Kvaale



Dei ni siste åra har Julesong hatt fulle hus på konsertar rundt om i Sogn og fjordane.

I år er songarane i Julesong tilbake saman med erfarne musikarar som Inge Ronny Kvåle på strengeinstrument, Bjørn

Tore Årøy på tangentar, Gjest Kvåle på gitar, John Børge Askeland på bass, og Trond Øyre med lyd- og lysdesign.

Konsertane som garanterer julestemning og gåsehud er sett saman av songar som høver til advents- og førjulstida.

Kremlaget som danner "Julesong 2024" vil dei fleste kjenna att frå konsertane i åra før, og frå tidlegare julekonsertar og andre framsyningar i Sogn og fjordane dei siste åra. Og ikkje minst TV-programmet "NRK Julelut" som vart vist på NRK1 på julafta 2014.

Einar, kjend frå m.a. Folk Flest, syng mange av dei største jule-klassikarane, medan Gunn Marit syng nokre av dei mest kjende nye julesongane, og sin eigen julesong "Heim til deg" - som vert spelt mykje på NRK P1 nasjonalt i førjulstida/jula! Kari vil mellom anna bidra med tradisjonsstoff frå folkemusikk og salmar. Saman framfører dei og duettar og andre songar, som gir lys og varme i den mørke desembertida.

Set av kvelden slik at du kjem i julestemning i år du òg!

Billettsal på <https://julesong.no/>

Julekonsertar

Konsert med Førde kammerkor i Dale kyrkje søndag 8. desember kl. 17.00



Julekonsert med Førde kammerkor. Ave Maria med fokus på Mariamusikk. Dirigent: Asbjørn Flåm. Solist: sopran Helen Tyssekvam. Piano: Noemi Utasi. Billettsal ved inngang.



Julekonsert i Guddal kyrkje søndag 15. desember kl. 19.30

Merk tidspunktet – vi håper alle guddølingane vil vere ferdig i fjøsen og kan oppleve Mark sin 30-årsjubileumskonsert i og for folk i Guddal. Konserten blir kombinert med ein julekonsert – vi får syngja våre kjære julesongar som allsong og høyre korsong v/ Guddalskoret. Det er lenger sidan siste konserten i Guddal – vi forventar eit stort innrykk av innbyggjarar som vil nyte ei fin førjulstund i vår vesle vakre kyrkje. Kollekt til Fond for Kyrkjemusikk. Vel møtt!

Den store julekonserten i Dale kyrkje tysdag 17. desember kl. 19.00

Vel møtt til den store julekonserten med Cantus, Dale Musikkorps, Dalsfjorden Spelemannslag, Dekor, kulturskulen, Ungdomskoret og sopransolisten Anne Marte Ospedal Haugen. 90 minuttar med stemningsfull julemusikk framført av våre dyktige lokale musikk krefter, samt allsong og eit ord for dagen med soknepresten. Kollekt til Fond for Kyrkjemusikk. Vel møtt!

Sortering EL-avfall kyrkjegardar og gravplassar i Fjaler

Vi har fått montert opp egne raude avfallsdunkar for el-avfall på kyrkjegardane og gravplassane i Fjaler. Desse er veggmontert på reiskapshus i Dale og Hellevik, på muren ved restavfallsdunk i Folkestad, og ved skjulet til vasskran i Guddal.



El-avfall skal ikkje i restavfallsdunkar, grunna brannfare mellom anna. Vi håper på ein god dugnad saman for at el-avfall blir trygt sortert vidare etter bruk på gravminnene.

Velkomen til Nadiia!

Vår nye kyrkjetenar og reinhaldar heiter Nadiia Vysochanska. Ein dag i sommar kom Nadiia inn på kyrkjekontoret og helste på oss. Vi gler oss over at det enda opp i at ho vart fast tilsett i 30% stilling hos oss. Nadiia har ansvar som kyrkjetenar under gravferder i Dale kyrkje, samt reinhald på Ljosheim og på kyrkjekontoret. Ho vil og fungere som vikar for kyrkjetenar elles i soknet etter avtale.



Vi ønskjer Nadiia velkomen i stabsfellesskapet vårt! Ta godt i mot henne.



Innhogging av nye namn og oppfrisking av skrifta på gravminne.

Kyrkjeverja formidlar kontakt med Allan Nogva Som kjem vår og haust og gjer slikt arbeid.

Ta gjerne kontakt!

BLADPENGAR – GÅVE TIL KYRKJEBLADET

kr 250 for dei som bur innan kommunen.
kr 300 for dei som får tilsendt bladet med frimerke
Bankkontonr: 3741.20.73135
Bladpengar
Vippsnummer: 557133

Kjekt å samlast i Folkestad

I innbydinga til hausttakkefestar i førre kyrkjebladet vart vi minna om at vi har mykje å takke for. Især om hausten, når årets gode avling skal i hus. Folkestad var sist ute, og det vart ein gjevande søndag i ytre.

Atle Lyngstad Ness tekst og foto

Folkestad kapell var fint pynta til haustsamling. Fleire hadde teke med seg av eiga avling, og noko importert. Også dei fine fargane som hausten byr på, fekk sin plass. Konfirmantane tok del og til opning kom dei inn i prosesjon saman med sokneprest Knut Arne Kummeneje.

Dei som kanskje var mest spent av alle denne dagen, var dei tre 6-åringane som skulle få «Mi kyrkjebok». Dei hadde med seg søsken, foreldre og besteforeldre, ja, endåtil oldeforeldre ville ha med seg dette i storhendet. Nett slik kyrkja ønskjer det skal vere!

6-årsboka handlar om Nora som nett har begynt på skulen. Boka har mange forteljingar frå Bibelen, og sjølvsgagt har dei kristne høgtidene jul, påske og pinse fått plass. Med boka følgjer eit arbeidshefte der borna kan vere kreative, fargeleggje og teikne.

Søstrene Våge kallar dei seg enno, endå om nokre etternamn er endra frå då dei begynte å spele gitar og syngje saman på søndagsskulen hos tante Amanda Våge. No er dei tre – Aud, Judith og Marit – tidlegare var også Arnhild oftast med når dei song på basarar og andre samlingar. To av dei bur der framleis, Marit, som også trakterer munnspelet, bur på Skilbrei.

Denne dagen gav dei først til beste ein amerikansk gospel «Thank you my lord for your blessings» (Redeemed Quartet) som tre brør i Nord Carolina skreiv i 1954, men som tidlegare lærar i Våge, Hogne Kvangarsnes,



Koret i kapellet var fint pynta til hausttakkefest, med markens grøde og i fine fargar.



Henriette Sofie Strømberg og Tijan Olai Stølen hadde fleire oppgaver i gudstenesta, med dramatisering og som medhjelparar til presten.



Seksåringane hadde sett fram til dagen og fekk eeeeeendeleg boka si, litt ut i gudstenesta. F.v. Mathias Lindland Herland, Ingvill Lutentun og Emil Myklebust Hauken.



Konfirmantane deltok i prosesjonen saman med soknepresten.

på spørsmål frå Aud har omsett til nynorsk, med tittelen «Takk, gode Gud».

Dei tre framførte også «Tett ved sida mi går Jesus» med tekst av Halldis Reigstad, tonesett av Gunnstein Draugedalen og «Himmellosen» av Paul Karlstad og Hartvig Nilsen, og som Lise og Ludvig Karlsen på Evangeliesenteret har gjort kjend her.

Attåt prosesjonen tok to av konfirmantane, Henriette Strømberg og Tijan Stølen, del i gudstenesta med dramatisering og som assistentar til presten. Mark Taylor hadde god hand om orgelspelet, og etter gudstenesta samlast dei som ville til kyrkjekaffi bak i kapellet.




Søstrene Våge har vore med i kapellet mange gonger frå dei begynte å gå der når tante Amanda Våge hadde søndagsskule. F.v. Aud Torhill Våge Haugstad, Judith Helene Våge og Marit Grethe Våge Apneseth.

Sunnfjord Gravferdsbyrå

Vi vil på beste måte hjelpe
dykk som pårørende,
med alt som høyrer ei
verdilig gravferd til.

Blomsterorget AS · Dale Senter · 6963 Dale i Sunnfjord
Telefon 57 73 98 00 · Mobil 975 21 569



Bli med på trusopplæring!

For 2-åringane!

Laurdag 18. januar kl. 11.00–12.00 inviterer Kyrkja i Fjaler til eit opplegg for dei som har fylt 2 år. Alle 2-åringane i soknet blir invitert til ei samling på Ljosheim. Då skal vi synge songar frå *Mi Kyrkjebok 2*, og mellom anna lære nokre kveldssalmar. Elles skal dei få bli kjent med Krølle, det vesle lammet som gjekk seg bort.



Den store forteljinga!

I januar-februar 2025 vil vi invitere "minikonfirmantane" med på "Den store forteljinga" som handlar om Bibelen dei mange spennande forteljingane vi kan lese der. I år



blir det dei i Flekke og Dale som er født i 2014 som får innbyding, samt dei som er født i 2014, 2015 og 2016 i ytre Fjaler. Samlingane blir på Ljosheim i Dale og i Folkestad kapell.

Gudstenestene med utdeling av Teikneseribibelen er

- Dale kyrkje søndag 2. februar kl. 11.00
- Guddal kyrkje søndag 2. februar kl. 14.00
- Folkestad kapell søndag 9. februar kl. 11.00

Gjennom desse samlingane håper vi borna vil lære mykje både om Bibelen og gudstenesta. Vel møtt!

KAK

Ver ein GT-agent!

I snart to tusen år har vi feira gudstenester. Menneske begynner sitt kristenliv ved å bli døypt i ei gudsteneste. Deltaking i og utbytte vert større med kjennskap til og forståing av innhaldet i gudstenestene våre.

GT-agentane er eit spennande opplegg om desse samlingane vi har i kyrkja som heiter «gudstenester». GudsTeneste = GT - Kom og utforsk gudstenesta vår som ein GT-agent!

Lær meir om dei faste songane som vi syng gjennom heile året og forteljingane frå bibelen som ligg bak dei.

- ? Visste du at vi syng på gresk i kyrkja?
- ? Kva heiter bursdagssongen til Jesus?
- ? Kven er Guds Lam?

Svara til desse og mange andre spørsmål vil sokneprest Knut Arne Kummeneje og kantor Mark Taylor gi deg gjennom leiteoppgåver, song, rørsler, rebus, forteljing og rollespel slik at du vil vere tryggare på det som skjer i gudstenestene våre og kvifor.

To samlingar

I Dale kyrkje for barn frå 4. klasse frå Dingemoen og Flekke skular.

Samling 1: Torsdag 27. februar kl. 11:45-13:00 for GT-agentane.

Samling 2: Søndag 2. mars kl. 11:00. Gudsteneste med GT-agentane og alle andre!

Vel møtt!

Mark Taylor

Kantor i Fjaler *Visste du at "kantor" er latin og tyder "songar" på norsk?*



STØRST AV ALT
BARN OG UNGE I DEN NORSKE KYRKJA

Kjemp for rettferd

Menneske er ein del av skaparverket og alle av oss treng rettferd – difor inkluderer handlingsplanen for vår grønne kyrkjelyd støtte til rettferds- og diakonalt arbeid, t.d. ved å samle inn pengar til Kirkens Nødhjelp, kyrkjene i Noreg sin organisasjon for internasjonal diakoni, som er til stades i Libanon, Gaza og Sudan, og jobbar hardt for å kome fram til dei som er hardast råka. Kirkens Nødhjelp er også engasjert i Ukraina, og kjem med denne julehelsinga:

Ei trygg hamn

UKRAINA: På flyktningssenteret til kyrkja Love of Christ møter vi 4 månader gamle Miran og mora Takhmina. Dei har vore i fangenskap og på flukt sidan krigen braut ut for snart tre år sidan. Medan dei eldste barna leikar i portrommet utanfor, fortel Takhmina oss historia si, med Miran ved brystet.

Då russarane kom

Russarane kom så fort at familien ikkje rakk å flykte. Soldatar small opp døra heime hos henne, der ho sat åleine med barna. Dei neste ni månadene vart eit mareritt, der ho berre fekk oppleve dagslys ein einaste gong. Takhmina og

barna vart låste ned i kjellaren, medan soldatane slo seg ned i huset. Ho og barna torde ikkje gå ut. Ei bøtte vart toalettet til heile familien, rå poteter og innimellom nokre grønsaker var alt dei fekk å ete. Lukta var forferdeleg. Ein pensjonert nabo risikerte livet ved å levere drikkevatt til familien nokre gonger i veka.

Tryggleiken

Ukrainske styrkar klarte til slutt å ta tilbake området der dei budde. Nyleg kom ho til tilfluktsrommet i Mykolaiv der Kirkens Nødhjelp, saman med den lokale kyrkjelyden, har gjort bomberommet under kyrkja om til ein trygg heim for folk på flukt. Her finst senger, kjøken, dusj og aktivitetsrom for barn. Ei nydeleg lukt av borschtsuppe siv ut frå kjøkenet. – For første gong på veldig lenge søv vi no gjennom heile natta. Det er så stille og godt her, og det kjennest som vi har kome til ei trygg hamn.

Folk i kyrkjelyden og andre frivillige hjelper flyktningane med det dei treng. Takhmina og barna har hatt besøk av ein psykolog i dag tidleg, og jobbar no med å skaffa seg nødvendige papir, slik at dei kan få

sosialstøtte og kome seg vidare i livet. – Det er Guds velsigning at vi klarte å kome oss levande hit til denne staden, seier Takhmina.

Både i Ukraina og i Noreg skal vi snart feire jul og minnst den natta Jesusbarnet vart fødd inn i ei verd med fattigdom, forfølging og nød.

No, som då, er Gud midt i lidinga og nøda. Vi ser om og om igjen at menneske finn trøyst og håp i trua på noko som er større. Større enn oss sjølve, større enn fortvilninga og større enn "her og no". Kirkens Nødhjelp samarbeider med kyrkjer og religiøse samarbeidspartnarar over heile verda. Vi har ein tilleggsverdi i vårt diakonale arbeid - trua på eit håp, og at alle menneske er like mykje verd. Det er vårt kall og vår oppgåve å kjempe mot nød og fattigdom. Saman med kyrkjene i Noreg reddar vi liv, byggjer sterke lokalsamfunn og kjemper for rettferd - kvar dag.

Juleoffer på Julafan i Folkestad, Guddal og Dale går til Kirkens Nødhjelp.

MT

Viss du ikkje har høve til å kome til julegudstenesta på julaftan:
SLIK GJEV DU DEN VIKTIGASTE JULEGÅVA I ÅR: Vipps eit valfritt beløp til **2426** Send **GAVE** på SMS til **2426** og gje 300 kroner. Gåvekonto: **1594.22.87248**

Og be bøna frå bispedømerådet: Vi ber for Kirkens Nødhjelp og alle andre som er til stades med hjelp. Ver nær dei som bidreg til at menneske blir sette og får mat og vatn, og som jobbar under vanskelege tilhøve. Hjelp oss å dele våre ressursar, til å forplikte oss til kjærleik og medkjensle, og til å kjenne att Guds andlet hos kvart einaste menneske som lid. Amen.



Foto: Håvard Bjelland, Kirkens Nødhjelp

160-åringen held seg godt

24. november 1864 vart ny kyrkje i Dale teken i bruk. Den tredje i rekka, så langt vi veit. Den har såleis 160-årsjubileum i desse dagar.

Atle Lyngstad Ness

Ein måned før julekvelden i 1864 song dei slik i nyekyrkja i Dale, til tonen frå Lover den Herre:

«O, Herre Jesus, du
som her nyt Hus har oss bygget,
Hytte med Vandskyl og Ly,
imod Heden beskygget.
Lov være dig!
Hver Dag din Miskund er rig!
Himlen av din Lov er vugget»

Vi veit ikkje kven arkitekten var, men byggmeister J. A. Øvsthus frå Hosaner på Osterøy hadde ansvaret for reising av bygningen, med totalt 550 sitjeplassar når galleria over såvel preste- som dåpssakristiet vart teke i bruk.

Kyrkja vår er kjend for særleg god akustikk og såleis veileigna både til song og musikk. Under restaureringa til 100-årsminnet i 1964, fekk veggane att sin trekvite farge, etter å ha vore måla gulbrune i 1905. Innvendig er kyrkja sidan halden mest i grått og grønt, og den er etterisolert i golv og tak og har fått montert innvendige, isolerande vindauge.

Altartavla, ei av dei største i Sunnfjord, måla Anders Askevold i Paris, og den har motiv frå Jesu oppstode, med tekst frå Johs. 11,25: «Eg er Opstandelsen og Livet, hvo som tror på mig, om han end dør, skal han dog leve».

På venstre side framme i skipet heng også den gamle altartavla, ei renessansetavle frå kring 1620. Men i motsetning til «tvillingen» i Holmedal kyrkje, er tavla vår ikkje restaurert.

Vi fekk som kjent nytt orgel i 1983, og eit fint, nytt konsertpiano for eit par-tre år sidan. Sidan vi fekk heiltidstilsett organist i 1979, har kyrkja hatt både barnekor og kyrkjekor heile tida.

Endå om vi ikkje er aleine om å ønskje større kyrkjesøknad, bør det vere eit mål å få større oppslutnad om samlingane i kyrkja. Det er ikkje lagt opp til stor markering av 160 år, sjølv om runde dagar er verd å nemne og hugse på, både for menneske og kyrkjer.

Nyleg har vi teke i bruk desse nye lesepultkleda, som soknepresten fortel nærare om.



Den 160 år gamle kyrkja ligg fint til ned mot Storelva.
Foto: Odd J. Kjørstad



I samband med restaureringa til 100-årsjubileet i 1964 fekk veggane igjen den trekvite fargen etter å ha vore gulbrune i 60 år. Sidan har interiøret vore halde i grønt og grått, ein god kombinasjon til eit fint kyrkjerom. Foto: Atle Lyngstad Ness

«Neimen ikkje verst»

29. september hadde kantor Mark Taylor den første av tre konsertar som markerer 30-årsjubileet hans i Fjaler. Først ut var Dale kyrkje, der eit hundretals tilhøyrarar, utanom aktørane, var samla. Dei fekk godt betalt for ein time i kyrkja denne kvelden.

Atle Lyngstad Ness

At sindige sunnfjordingar tek i bruk ord som «heilt utruleg», «kjempeflott» og «fantastisk» om noko dei opplever, høyrer nyare tider til. Før var det meir vanleg å nøye seg med «ditta va'kje verst» eller om maten - «eg ha' smakt da verre» Då var det i realiteten gode greier.

Mark Taylor har vore her i 30 år, og Knut Arne Kummeneje i 29 år. Så då er dei vel for gode sunnfjordingar å rekne. Begge to. I alle fall viste Knut Arne seg som det i takketalen til Mark etter konserten: «No har du Mark vore organist her i 30 år. Det er neimen ikkje verst!»

Utsegna femner mykje – både at det er godt gjort å vere 30 år på ein arbeidsplass. Men det ber også i seg noko om at dei 30 åra har gitt



Ein dryg times konsert krev både konsentrasjon og koordinasjon frå den som spelar. Denne gongen fekk publikum også oppleve organisten på storskjerm frå kyrkjebenken, noko dei opplevde som eit pluss.



Mange nytta høvet til å takke Mark Taylor etter jubileumskonserten i Dale kyrkje. Mellom dei Jofrid Eikerol Løseth som helsa frå Cantus, og Knut Arne Kummeneje som bar fram helsing og takk frå kyrkjelydane i Fjaler.

kyrkjelydane mykje å vere takksame for.

- Mange kjenner deg som ein fyr som spelar orgel. Men også den som prøver å imøtekomme ønske frå familiane i bryllaup og gravferd. Når dei har ønske om musikk som er viktig for dei, men som ikkje finst i salmeboka, så prøver du så langt råd er å innfri ønske. Du legg for dagen stor allsidigheit, sa Knut Arne.

Han valde å streke særleg under den sida av arbeidet til Mark som vi kanskje ikkje tenkjer så mykje på når vi sit i kyrkjebenken og høyrer fingrar og føter danse over tangentar, manualar og pedalar – at han har vore hovudarkitekt i arbeidet med å innføre ny liturgi. Ikkje berre i Fjaler, men i heile prostiet. Mark har lagt arbeid i å finne salmar som passar til dagens tekst, og tenkt kvalitet heile vegen. - Du har lært og gitt oss mykje. Vi har hatt mange kjekke stunder her med deg. Det takkar vi deg for og ønskjer lukke til vidare, sa Knut Arne mellom anna.

I konserten hadde Mark med seg kora Cantus og Dekor, Dalsfjorden Spelemannslag og Dale Musikkorps på fellesnummeret «Dalsfjordbrura» komponert av felespelar Svein Bakkebo frå Straumsnes, og arrangert av Kåre Sandvik. Det vart både

opnings- og eitt av ekstranummera, med Hanne Heia Dybvik som dirigent. Mark spelte også frå «Tocatta og fuge d-moll» av J. S. Bach som ekstranummer.

På det oppsette programmet elles stod musikk av Johann Sebastian Bach, Charles Villiers Stanford, William Spark, William Wolstenholme, Thomas James Crawford og Garth Edmundson. Litt for ein kvar smak, frå det vare og rolege til det meir virtuose.

Nytt for kvelden var det sett opp kamera på galleriet, slik at publikum ikkje berre høyrde musikken, men kunne følgje Mark utfalde seg på orgelkrakken på storskjerm frå kyrkjebenken.

Ein slik time krev både konsentrasjon og koordinasjon på høgt plan. Det gjekk fint, og dei som kan sin Jakob Sande, drog kanskje ein aldri så liten parallell til organisten frå «Musa i orgelet» - han som var sprek som ein orre på topp.

Mange i publikum nytta høvet til å takke Mark for kvelden og åra. Kollega Sabina Baylarbayova takka, det same gjorde Jofrid Eikerol Løseth på vegner av Cantus, for kjekke stunder og alt du har lært oss.

KYRKJEÅRET, FARGAR OG DAGANE

Kvit var i urkristen tid den dominerande fargen i kyrkja. Men etter kvart kom det til fleire liturgiske fargar, og i dag har vi fire; kvitt, raud, grøn og fiolett.

Kvitt – fargen for Kristushøgtidene, fest og glede

Fiolett – fargen for førebuing, bot og sorg

Raudt – fargen for Anden og kyrkja, blod, eld, martyrium og kjærleik

Grønt – fargen for vekst og livskraft

Dei liturgiske fargane på spesielle dagar

Kvitt: Maria bodskapsdag, Jonsok, Mikkelsmesse, Allehelgensdag, Treeiningssøndag

Fiolett: Bots- og bønedag

Raudt: Stefanusdagen (2. juledag), Aposteldagen

(6. søndag i treeiningstida), Olsok (Olavsdagen)

Grønt: Hausttakkefest, Skaparverksdagen, 1. mai, 17. mai, Samefolkets dag (6. februar)

Andre merkedagar

Lysmesse, Luciadagen (13. desember), Kyndelsmesse (2. februar), Jonsok (24. juni), Reformasjonsdagen (31. oktober)


Dei liturgiske fargane ved kyrkjelege handlingar

Dåp: kvitt eller fargen for kyrkjeårstida

Konfirmasjon: raudt, kvitt eller fargen for kyrkjeårstida

Vigsel: kvitt

Gravferd, skriftemål og sørgegudsteneste: fiolett



Lesepult-kleda i Dale kyrkje

Symbol

Rundt oss er det mange symbol. Eit symbol er ein ting eller eit teikn som viser til noko anna enn det eigentleg er. Symbol blir ofte brukt til å uttrykke ting som kan vere vanskeleg å seie med få ord. Det er mange forskjellige symbol i kristendommen. Denne gongen har vi fokus på symbola på lesepultkleda i Dale kyrkje.



Det fiolette lesepultkledet

Fiolett er botsfargen fordi den er ein blanding av raud, kjærleik, og blå, sanning. Blått er himmelens farge. Derfor symboliserer blått sanning. Både advent, faste og bønnedag har i den kristne kyrkja ein sterk appell til å ha eit personleg tilhøve til Gud.

Det er blitt vanleg i heimane å bruke ein adventsstake med fire lys, der eit nytt lys blir tent kvar søndag i adventstida. Og lysa er fiolette slik adventstida er. På det fiolette lesepultkledet i Dale kyrkje er adventslysa kvite, kanskje fordi lysa i kyrkjene ofte er kvite. Kvit er teiknet på heilagdom og reinleik. I kristendommen er krossen det mest brukte og det sterkaste symbolet. Krossen er eit symbol på frelse, og det minner om at Jesus døydde, at han sigra over døden.

Stola er eit langt og smalt klede som blir

bore av prest, kateket, diakon og kantor under gudstenester og andre liturgiske handlingar. Den er teikn på vigsla teneste. Prestar har rettstilt stola, mens dei andre ber skråstilt stola. Stolaen har kyrkjeåret sine liturgiske fargar.

Stolaen kan også forståast som eit teikn på Kristi åk, det vil seie den kjærleikens teneste som den vigsla tek på seg i fellesskap med Kristus. Når stolaen heng på tverrbjelkane på krossen i det fiolette lesepultkledet, er det eit teikn på det åket, den børa Jesus tok på seg ved å døy, og tok plassen til syndarar.

Det fiolette lesepultkledet i Dale kyrkje har også ein glorie som omkransar øvste del. Glorien om Kristi hovud fekk tidleg eit spesielt kjenneteikn: ein kross blei teikna saman med glorien. Glorien signaliserte at Kristus er «ei utstråling av Guds herlegdom» (Hebr 1,3)

Den latinske krossen er i dag mest vanleg som symbol for dei vestlege kristne kyrkjesamfunna. Tverrbjelken er kortare enn den ståande bjelken. Krossen fortel om Kristi lidning og sigerrike død. Det er denne forma som er mest brukt i kyrkja vår, og den høyrer til dei eldste krossformene vi kjenner.



Det kvite lesepultkledet

I det kvite lesepultkledet i Dale kyrkje finn vi Guds hand, som er blant dei

vanlegaste antropomorfismane i *Bibelen*, og det var også den einaste måten ein torde å framstille Faderen på i oldkyrkja. Handa er blant dei eldste og mest vanlege symbola på Gud. Den fortel oss at Gud alltid er hos oss. Hans hand blir rekt til oss for å vere nær, hjelpe og leie oss på rett veg.

I det kvite lesepultkledet i Dale kyrkje er handa plassert inne i ein ring. Ringen er æve-symbolen. Ein sirkel har same symbolikk. At ringen er symbolet på æve har sin grunn i at det ikkje har nokon byrjing eller slutt. Og handa peikar på den første og siste bokstaven i det greske alfabetet, Alfa og Omega, byrjinga og slutten. Dei framhevar Kristus som den første og den siste. (Op21,6)



Det grøne lesepultkledet

Grønt er vårens farge. Vi tenkjer på kristenlivets vekst og modning. Sånn sett er den håpet sin farge. I Johannes openberrig 4,3 blir det fortalt at Johannes får sjå Gud i majestetisk ro på trona si og rundt trona også ein

regnboge, av farge som «smaragd», det vil seie grøn.

Krossen sin stamme kunne vore malt grøn. Det skulle då fortelje om livstreet frå Edens Hage, med det håp og liv som knyter seg til Kristus.

Her kan ein sjå ein drueklase (Jesu blod) på den eine sida, og eit kornband eller kornaks (Jesu kropp) på den andre sida. Mellom desse symbola er det eit Kristus-monogram. Nattverdens sakrament er her representert i og gjennom Kristus. Kristus-monogrammet ser ut som ein X og ein P som er lagt oppå kvarandre. På gresk er dette teikna for K (chi) og R (ro), og dannar dei to første bokstavane i namnet Kristus.



Det raude lesepultkledet

Raudt blir stundom treeiningsfargen fordi den skal minne om ein treeinig Gud som kan knytast til guddommens

tre personar: 1 Guds kjærleik (Så høgt har Gud elska verda, at han gav Son sin. Joh3,16) – 2 Kristi blod – 3 Andens eld.

At raudt er kjærleiken sin farge kjem sjølvsagt av at det er hjartefargen. Olsok og 2. juledag, Stefanus-dagen, den første kristne martyr, minner altså raudt om Kristi blodvitne som gav sitt liv for evangeliet. Tanken er at 1. juledag skal vere gáva, barnet i Betlehem, medan 2. juledag skal vere oppgåva, at den som har motteke det store, skal vere villig til og med å gi sitt liv, om nødvendig.

Det eigentlege symbolet for Den Heilage Ande er ei kvit due. Den viktigaste symbolske betydning fekk

dua då Jesus blei døypt, og Den Heilage Ande kom ned som ei due. Eld kan, som Anden, også vere eit symbol for Guds nærvær. Då Moses førte Israelfolket gjennom ørkenen, gjekk Gud kvar natt framfor dei som ei eldsøyle. Gud viste seg også for Moses i form av ein brennande busk.

På den første pinsedagen kom Den Heilage Ande og sette seg som eldtunger på hovuda til apostlane. Dua og elden, som vi ser i det raude lesepultkledet i Dale kyrkje, er altså symbol på Den Heilage Ande. Dua er, saman med krossen, dei einaste kristne symbola som vert brukt i alle dei kristne kyrkjene.

Knut Arne Kummeneje

Takk til Atle!

Dei siste åra har Atle Lyngstad Ness gjort teneste i kyrkja som kyrkjetenar. I tillegg har han vore engasjert i konfirmantarbeidet og trusopplæringa der han særleg har stått for matservinga i samlingane. Vi er veldig takksame for det arbeidet han har gjort som har vore av stor betydning for kyrkja, dei tilsette, og mange fleire, ikkje minst born og unge. Tusen takk!



TRENG DU NOKON Å FORTELJE DET TIL?

Vi er her. Alltid. kirkens-sos.no



SOS
22 40 00 40



SOS
CHAT

SOS
MELDING

KIRKENS
SOS



Barnas



Fargelegg!

Teikning:
Chiara Bertelli



Finn 10 gutenamn


Leit bortover og nedover. Finn du alle?

K	E	Y	J	E	S	U	S	J	N
A	K	S	E	L	T	S	S	O	I
E	S	P	E	N	H	A	T	H	S
R	M	O	R	T	E	N	K	A	A
L	J	Y	M	T	O	D	D	N	K
I	F	V	C	T	D	E	W	N	A
N	K	S	K	K	O	R	K	E	F
G	R	H	U	J	R	Q	A	S	M
O	U	X	J	P	J	W	P	I	E
F	D	Z	T	H	O	R	O	T	A

Gje barnebladet
Barnas til eit barn
du er glad i!


Desse oppgåvene er
henta frå bladet.

Bestill abonnement
på sondagsskolen.no
eller 22 03 71 00



Kva
høne har
ikkje fjør?
Svar:
Marilhøna

Vits



Labyrint

Kan du hjelpe Maria å
finne vegen til Elisabet?

Finn fem feil

Her fortel Gabriel Maria at ho skal bli mammaen til Jesus. Dei to bileta er
nesten heilt like, men kan du finne dei fem feila på biletet til høgre?



Teikning: Chiara Bertelli



Søndagsskolen – mer enn du tror

Juleverset - Eit lite barn (salme 30)

Denne julesalmen er kalla for juleverset i norsk tradisjon og er faktisk eit vers frå den førreformatoriske julesongen frå 1400-t, Dies est laetitiae. Artig at den gamle melodien til juleverset lever vidare i salmeboka vår som tonen til høgtidsverset for pinse, 228 Du loge av Guds kjærleikselv, mens juleverset «Eit lite barn» syng vi til ein norsk folketone frå Stangvik i Nørðmøre, men folketonen er faktisk ein godt pynta variant! Edvard Bræin skreiv ned folketonen i første hefte av hans Folkemusikk nedtegnet i Nordmøre i 1928.

Martin Luther kjende julesongen og sa i ein av julepreikene sine over Jes 9,6: «Av denne teksten er den skjøne songen teken, som ein no syng i jula: Eit lite barn.» Han nemna den også i gudstenesteordninga si Formula missae i 1523.

Den danske forfattaren Grundtvig gjendikta juleverset i 1837. Landstad omarbeida verset til salmeboka si, men det var ikkje før Salmer 1997 at vi fekk den nynorske omsetjinga frå 1995 av salmediktaren Jan Ove Ulstein, født i Ulsteinvik, men som har arbeidd som dosent i teologi ved Høgskulen i Volda.

Dette enkelte juleverset inneheld



likevel hovudbodskapen i jula: Jesus, fødd av ei jomfru, er vår Gud fødd som eit barn, vår frelsar.

Så frelsargjeringa, Joh 3,16, i negativ form – om ikkje Gud hadde blitt menneske, ville kvar og ein gå fortapt.

Og til slutt vårt svar: Vi takkar Jesus at han vart eit menneske, fullt og heilt som oss, og ber han om å frelse oss i sin nåde.

Som vi høyrer på 1. juledag i Joh 1: Og Ordet vart menneske og tok

bustad mellom oss.
Og vi såg hans herlegdom, full av nåde og sanning.

*Eit lite barn, med frydeskrik,
er fødd for oss her nede
ut av ei møy, så nåderik,
vår Gud, som barnet spede.
Om ikkje han bar manndom rein,
vi gjekk fortapte, kvar og ein,
då måtte helvet råde.
Vi takkar deg, du Jesus Krist,
at menneske du vart for visst.
Å, frels oss i din nåde.*

MT

ALVÆRVIK CONTAINERSERVICE AS

- Containerutleige 8 m³ – 35 m³
- Vi tar på oss alt av transportoppdrag
- Vi hentar alt av stålskrap

90 20 11 00

CONTAINERUTLEIGE • rune.container@gmail.com



Samarbeid om ny kyrkjelyds-pedagog-stilling!



Sokneråda i Askvoll, Hyllestad og Fjaler har inngått samarbeid om å opprette ei kyrkjelydspedagog/kateket/-stilling.

Samarbeidet gir Askvoll 40% av stillinga, Hyllestad og Fjaler 20% av stillinga kvar. Vi skulle helst hatt ei 100% stilling, men 80% blir tilbydd fast.

Kva gjer ein kyrkjelydspedagog? Kyrkjelydspedagog har ansvar for kyrkjeleg undervisning, eller trudsopplæring/dåpsopplæring som og blir brukt som kjente ord, for barn og unge mellom 0-18 år. Dette skjer i samarbeid med stab elles, frivillige, foreldre, barna og ungdomane. Vi vil med dette styrke møteplassane for barn og unge slik einkjenner det i kvart sokn i dag, og utvikle møteplassane slik det er naturleg.

Vi arbeider for at dette skal vere ei attraktiv stilling, med høg trivsel og gode arbeidstider. Sjå utlysinga i ei anna side i kyrkjebladet, og oppmode personar du gjerne vil ha inn i stillinga til å søke.

Dette blir bra!

LJOSHEIM TILBYR MULTIMEDIA I MØTEROM/SALAR

Fjaler sokneråd har investert i multimedieutstyr til møtesalane. Med dette er alle tre møterom og salar klargjort for møter og konferanser frå 1-110 personar.

Ljosheim har universelt utforma inngangsparti med automatisk døropnar i hovudplan, og trinnfri tilkomst i underetasje. Det er handikoptolett i begge etasjer. Teleslynge tilbyr vi pr i dag ikkje.

Underetasje:

Matsal: Bordsetting for inntil 110 personar. 2 x85tommar tv-skjermar med hdmi1/blåtann-tilknytning. Høgtalar i rom og trådlus mikrofon er under vurdering. Hovudkjøkken i huset ligg i tilknytning til denne salen.

Hovudplan:

Småsal: Møterom for inntil 11 personar rundt møtebord. 1 x 75tommar tv-skjerm m/hdmi1/ blåtann-tilknytning + 2-vegs konferanse fr teamsmøter. 6 sitteplassar til i sofagruppe. Tv-skjerm står på hjul og kan skråstillast for å vere synleg i heile rommet. Minikjøkken m/ mikro og oppvaskmaskin.

Storsal: Møterom for bordsetting inntil 60-65 personar. Sitteplassar uten bord ca 90. LED-prosjektor i tak, trådlus mikrofon og 4 høgtalarar i rom. Konferanseutstyr for teamsmøte er mobilt frå småsal.





DEN NORSKE KYRKJA

Askvoll, Fjaler og Hyllestad kommunar, med til saman over 7000 innbyggjarar, omkransar fagre Dalsfjorden i vakkert kystlandskap. Det er gode kommunikasjonar sørover til Bergen (ca. 2,5 t) med to daglege ekspressbåtavgangar sørover, forutan bussforbindelse og kort veg til Førde med bil/buss (ca. 1 t).

Ledig stilling: KYRKJELYDSPEDAGOG

Inntil 80% stilling

Sokna i Askvoll, Fjaler og Hyllestad har inngått eit nytt samarbeid om felles pedagog til den kyrkjelege undervisninga for barn og unge frå 0-18 år i samarbeidsområdet. Stillinga er ledig for snarleg tiltreding, og den som vert tilsett vil få ei leiande rolle i realisering og vidareutvikling av dei vedtekte planane i sokna. Kyrkjelydspedagogen vil utføre arbeidet sitt i samarbeid med lokalt trusopplæringsutval i soknet, styringsgruppa for stillingssamarbeidet, sokneprest, kantor/organist og andre lønna og ulønna medarbeidarar.

Det er om lag 940 kyrkjemedlemmer i aldersgruppa 0-18 totalt i sokna. Plan for den kyrkjelege undervisninga er vedteke i alle sokna, men ikkje alle tiltaka er innfasa enno.

Hovuddelen av trusopplæringstiltaka vil vere lokalisert i kommunesentraene med Askvoll kyrkje, Dale kyrkje/ Ljosheim og Hyllestad kyrkje. Lokala her er godt eigna for trusopplæringsaktivitetar, med mellom anna multimediautstyr, fleksibel møblering, kjøkkenfasilitetar m.v. Det er jamt over svært god oppslutning (over 80% i fleire av trusopplæringstiltaka) i sokna. For nærare informasjon om sokna og om undervisningstilbodet til barn og unge, sjå:

www.askvoll.kyrkja.no
www.kirken.no/fjaler/
www.hyllestad.kyrkja.no

Arbeidsoppgåver:

- Fylgje opp og vidareutvikle lokale planar for den kyrkjelege undervisninga i soknet
- Saman med trusopplæringsutvala og styringsgruppa ansvar for at tiltaka i trusopplæringsplanane vert gjennomførte.
- Delta i gudstenester knytt til trusopplæringa.
- Delta i arbeid blant born og unge.
- Rekruttere og inspirere ulønna medarbeidarar.
- Profilere trusopplæringsarbeidet i ulike medier.
- Rapportering.

Vi ynskjer ein person som:

- Har interesse og engasjement for kyrkjeleg arbeid for born og unge.

- Har minimum 3-årig høgare utdanning med pedagogikk og/eller kristendom i fagkrinsen. Manglande utdanning kan kompensert med relevant erfaring.
- Har kjennskap til Den norske kyrkja si verksemd.
- Har gode kommunikasjonsevner og norskkunnskapar og erfaring med sosiale medier.
- Kan arbeide sjølvstendig og systematisk.
- Har personlege eigenskapar som gjer ein skikka for stillinga (engasjement, kreativitet, formidlings- og samarbeidsevne).

Opplysningar om stillinga:

- Løn etter kvalifikasjonar etter gjeldande tariffavtale i KA sitt tariffområde.
- God pensjonsordning i KLP.
- Kyrkjevevja i vertsfellesrådet er næraste overordna for stillinga.
- Fast kontor plass på kyrkjekontoret i Askvoll eller Dale sentrum i triveleg kollegafellesskap saman med sokneprest, kantor/organist, kyrkjeseekretær og kyrkjevevja.
- Ein må rekne med noko arbeid på kveldstid og i helgar.
- Søkjar må vere medlem av Den norske kyrkja.
- Søkjar må disponere bil (skyssgodtgjersele).
- Den som vert tilsett må levere tilfredsstillande politiattest.
- Oppstart i stillinga: 1. februar eller etter avtale.

For nærare opplysningar om stillinga, ta gjerne kontakt med: Kyrkjevevja i Fjaler: Jostein Bildøy telefon 951 91 332, eller e-post: JB286@kyrkja.no

Kyrkjevevja i Askvoll: Rune Ziener telefon 918 74 724, eller e-post: rz459@kyrkja.no
 Søknad med CV og kopi av vitnemål og attestar kan sendast på e-post eller post til: rz459@kyrkja.no

Askvoll sokn
 Postboks 14
 6988 Askvoll

Søknadsfrist: 5. januar 2025

Baby- og småbornssong på Ljosheim

Frå januar 2023 overtok eg babysong i Dale, etter Guri Høstaker Nordheim. Heilt frå den tid til i dag har vi hatt mange veldig gode samlingar, der både born og vaksne har dde det veldig kjekt i lag med oss og kvarandre.

Babysong er eit tiltak for born frå nyfødde til eitt år. Vi har to samlingar i månaden, annankvar mandag.

Frå hausten 2023 kom ideen om å fortsette med born som hadde vore på babysong, men som var begynt i barnehagen. Då starta vi småbornssong, som er eit fint tiltak for dei mellom 1 og 3 år.

Det er utruleg fint å sjå korleis småborna gjenkjenner og reagerer på songane dei først fekk høyre på babysong

Vi inviterer også andre sysken i familien som har lyst å vere med.

Samlingane er ein gong i månaden, siste laurdag i kvar måned. Datoane blir endra om det er påske eller pinse.

Åsa Øvrebø Stav hjelper meg å drive både babysong og småbornssong, og nokre fine bilder frå samlingane våre viser kor kjekt vi har det i lag.

Sabina Baylarbayova



VELKOMEN TIL KYRKJE

Søndag 1. desember

Dale kyrkje kl. 19.00: Lysmesse. Konfirmantane, Ungdomskoret og Dale barnekor deltek. Offer til kyrkjelydsarbeidet.

Mandag 2. desember

Dale kyrkje kl. 18.00: Julekonsert med "Julesong": Einar Bolstad, Kari Malmanger og Gunn Kvaale. Billettal på <https://julesong.no/> I år er songarane i Julesong tilbake saman med erfarne musikarar som Inge Ronny Kvåle på strengeinstrument, Bjørn Tore Årøy på tangentar, Gjest Kvåle på gitar, John Børge Askeland på bass, og Trond Øyre med lyd- og lysdesign. Konsertane som garanterer julestemning og gåsehud er sett saman av songar som høver til advents- og førjulstida.

Søndag 8. desember

Guddal kyrkje kl. 16.00: Lysmesse. Konfirmantane og Guddalskoret deltek. Offer til kyrkjelydsarbeidet.

Dale kyrkje kl. 17.00: Julekonsert med Førde kammerkor. Ave Maria med fokus på Mariamusikk. Dirigent: Asbjørn Flåm. Solist: Helen Tyssekvam. Piano: Noemi Utasi. Billettal.

Folkestad kapell kl. 19.00: Lysmesse. Konfirmantane og vaksensonggruppa deltek. Offer til kyrkjelydsarbeidet.

Søndag 15. desember

Dale kyrkje kl. 11.00: Gudsteneste. Solosong v/ Ragnhild Høgseth Felde. Kyrkjekaffi. Offer til Redd Barna.

Guddal kyrkje kl. 19.30: Julekonsert og 30-årsjubileumskonsert med Mark Taylor (orgel), allsong og korsong v/ Guddalskoret. Kollekt til Fond for kyrkjemusikk.

Søndag 17. desember

Dale kyrkje kl. 19.00: Den store julekonserten med lokale medverkande. Kollekt til Fond for kyrkjemusikk.

Julaftan

Folkestad kapell kl. 11.00: Offer til Kirkens Nødhjelp.

Guddal kyrkje kl. 13.30: Guddalskoret deltek. Offer til Kirkens Nødhjelp.

Dale kyrkje kl. 16.00: Dale Barnekor deltek. Offer til Kirkens Nødhjelp.

Juledag

Dale kyrkje kl. 12.00: Høgtidsgudsteneste med Cantus og Dale musikkorps. Offer til NMS sitt arbeid i Midtausten.

Nyårsaftan

Dale kyrkje kl. 16.00: Solosong v/ Anne Marte Ospedal Haugen. Offer til kyrkjelydsarbeidet.

Søndag 12. januar

Folkestad kapell kl. 11.00: Solosong v/ Annika Tveit. Landy Bakke frå NMS deltek. Offer til NMS sitt arbeid i Midtausten.

Straumsnes grendahus kl. 13.30: Landy Bakke frå NMS deltek. Kyrkjekaffi. Offer til NMS sitt arbeid i Midtausten.

Søndag 19. januar

Dale kyrkje kl. 11.00: Ungdomskoret deltek. Kyrkjekaffi. Offer til Sjømannskyrkja – Norsk kyrkje i utlandet.

Søndag 26. januar

Folkestad kapell kl. 19.00: Syng med oss – Allsangkveld med kjende og kjære salmar. Kveldsmat. Offer til Folkestad bedehuskapell.

Søndag 2. februar

Dale kyrkje kl. 11.00: Familiogudsteneste med utdeling av bibelen. Minikonfirmantane og Dale barnekor deltek. Kyrkjekaffi. Offer til IKO – Kirkelig pedagogisk senter.

Guddal kyrkje kl. 14.00: Familiogudsteneste med utdeling av bibelen. Guddalskoret deltek. Kyrkjekaffi. Offer til IKO – Kirkelig pedagogisk senter.

Søndag 9. februar

Folkestad kapell kl. 11.00: Familiogudsteneste med utdeling av bibelen. Minikonfirmantane deltek. Offer til IKO – Kirkelig pedagogisk senter.

Søndag 16. februar

Dale kyrkje kl. 11.00: Solosong v/Marie Skadal. Kyrkjekaffi. Offer til Kirkens Bymisjon Bergen

Søndag 2. mars

Familiogudsteneste: GT-agentane og Dale barnekor deltek. Kyrkjekaffi. Offer til Redd Barna.

Søndag 9. mars

Guddal kyrkje kl. 11.00: Guddalskoret deltek. Kyrkjekaffi. Offer til NMS sitt arbeid i Midtausten.

Folkestad kapell kl. 14.00: Solosong v/ Marthe Eimind. Kyrkjekaffi. Offer til NMS sitt arbeid i Midtausten.

Søndag 16. mars

Dale kyrkje kl. 11.00: Cantus deltek. Kyrkjekaffi. Offer til NMS sitt arbeid i Midtausten.

Søndag 30. mars

Dale kyrkje kl. 11.00: Ungdomskoret syng. Kyrkjekaffi. Offer til SOS Barnebyer.

Folkestad kapell kl. 14.00: Song v/ Søstrene Våge. Kyrkjekaffi. Offer til SOS Barnebyer.

Søndag 6. april

Dale kyrkje kl. 19.00: Samtalegudsteneste med konfirmantane frå heile Fjaler. Offer til Kirkens Nødhjelp – Fasteaksjonen.

Tysdag 8. april

Dale kyrkje kl. 19.00: Solidaritetskonsert med Kulturskolen, Ungdomskoret og UWC. Kollekt til Kirkens Nødhjelp - Fasteaksjonen.

Sjekk www.kyrkja.no/fjaler, facebook.com/FjalerKyrkja Eller sjå «Det skjer» i Firda på nett for oppdatert informasjon

Vi har ein lang tradisjon i Fjaler med tekstlesarar i gudstenestene. Dette er ei særst viktig oppgåve.

Textlesaren les bibeltektstar og andre tektstar, og er ein viktig støttespelar for presten og kyrkjelyden. Viss du har lyst til å melde deg som tekstlesar, ta kontakt med kyrkjekontoret.

I kyrkjelyden sidan sist

Vigde

Guddal

19.04.2024 Aina Hugøy og Ivar Hovlandsdal

Dale

10.08.2024 Margrethe Vagstad og Jan Fredrik Størksen

07.09.2024 Beate Christin Oen og Ronny Johannessen

Døypte

Dale

04.08.2024 Henrik Viken

Jacob Skår

Theodor Sowerby Anthun

Sanna Tømmerbakke Åsnes

Synne Ness Haug

25.08.2024

Vega Solheim Haugsbakk

Sander Mortensbakke Strand

22.09.2024

Heine Aven Myklebust

Olav Arstein Myklebust

Mathea Ulvik Solstad

Erle Høydal Ramstad

Ane Hatlebrekke Norddal

06.10.2024

Tian Ullebø Breidvik

Lone Solås

20.10.2024

Emilio Rakneberg Hæggernæs

Guddal

25.08.2024 Even Kalstad
Lovise Kalstad

Døde

Dale

15.09.2024 Kjartan Olav Strand f. 1961

25.09.2024 Einar Leiv Nybø f. 1941

17.10.2024 Hilda Haugen f. 1933

20.10.2024 Bjørn Reinhardt Buttedal f. 1944

Guddal

09.10.2024 Ida Hovlandsdal f. 1929

Folkestad

25.10.2024 Trond Andre Furset f. 1970

Kyrkjeblad for Fjaler

Kontonr. 3741 20 73135

Bladpengar kr. 250 / 300 for året.

Redaktør: Knut Arne Kummeneje og
Hildegunn Helleset

Prent: Printfarm AS

fjaler.kyrkjeblad@gmail.com

Kyrkja i Fjaler

www.kyrkja.no/fjaler

Fjaler sokn

Dalsvegen 105A

6963 Dale i Sunnfjord

Tlf. 40 50 94 52

post.fjaler@kyrkja.no



Kyrkjekontoret er ope

Tysdag, onsdag og torsdag
kl. 09.00–14.00

Tilsette med kontorplass:

Sokneprest Knut Arne Kummeneje

mobil: 908 55 230

kk824@kyrkja.no

Kyrkjeverje Kristin Kalstad (permisjon)

Vikar verje: Jostein Bildøy

mobil: 951 91 332

Jb286@kyrkja.no

Kantor Mark Taylor

jobb: 40 50 94 52, mobil: 975 13 449

mt884@kyrkja.no

Kantor har fri kvar torsdag

Sekretær Hildegunn Helleset

jobb: 40 50 94 52, mobil: 909 60 321

hh696@kyrkja.no

Kyrkjetenarar:

Dale kyrkje

Gravferd: Nadiia Vysochanska tlf.: 909 57965

Gudsteneste: Oddbjørn Bjordal tlf.: 482 49547

Guddal:

Anne Brit Mo tlf.: 950 21 424

Kontaktperson Folkestad kapell: Randi

Fretland tlf.: 909 57 857

Vedlikehald av Hellevik og Folkestad

gravplassar Jostein Folkestad tlf.: 913 41493

Fjaler sokneråd

Leiar Trude G Høgseth Felde tlf: 992 84 351

Vipps #127523 Fjaler sokn

Vipps #557133 Fjaler kyrkjeblad

Vipps #616403 Fjaler kyrkjemusikk

Vipps #899129 Ljosheim

Kontonr. Fjaler sokn: 3741 07 14567

Kontonr. Ljosheim : 3741 20 36701

facebook



Kyrkja i Fjaler er på Facebook:
www.facebook.com/FjalerKyrkja


**NULL
STRESS**
VI TAR DET PÅ
v:pps



Julegudstenester 2024

JULAFTAN

Folkestad kapell kl.11.00

Guddal kyrkje kl.13.30

Dale kyrkje kl.16.00

Juleoffer til Kirkens Nødhjelp

1. JULEDAG

Dale kyrkje kl.12.00

Offer til NMS

NYTTÅRSAFTAN

Dale kyrkje kl.16.00

Offer til kyrkjelydsarbeidet

INFORMASJON

Avsendar: Fjaler kyrkjekontor
Dalstunet, Dalsvegen 105a
6963 Dale i Sunnfjord

God jul!